



## Dáileog bhreise den vacsaín in aghaidh COVID-19

Eolas do thuismitheoirí agus caomhnóirí leanaí agus daoine óga idir 12–15 bliana d’aois a bhfuil córas imdhíonachta lag acu

### Céard is córas imdhíonachta lag ann?

Troideann an córas imdhíonachta in aghaidh ionfhabhtuithe agus frídíní sa chorp. Is féidir leis an gcóras imdhíonachta a bheith lag de dheasca fadhbanna sláinte nó cógais a laghdaíonn an cumas chun ionfhabhtú a throid.

Cabhróidh dochtúir do linbh leat cinneadh a dhéanamh cibé acu ba cheart dó nó di dáileog bhreise den vacsaín in aghaidh COVID-19 a fháil nó nár cheart.

### An bhfuil níos mó riosca ag baint le COVID-19 do mo leanbh má tá a c(h)óras imdhíonachta lag?

Tá. Tá riosca níos mó ann go n-éireoidh sé nó sí go dona tinn má tholgann sé nó sí COVID-19.

### Fuair mo leanbh vacsaín in aghaidh COVID-19 cheana féin. Cén fáth a bhfuil dáileog bhreise den vacsaín á tairiscint dó nó di?

Tá súil againn go bhféadfadh dáileog bhreise den vacsaín:

- freagairt a c(h)órais imdhíonachta ar an vacsaín a fheabhsú.
- cosaint ní b’fhéarr in aghaidh COVID-19 a thabhairt dó nó di.
- a cion féin a dhéanamh le nach n-éireoidh sé nó sí go dona tinn le COVID-19.

### Cén vacsaín a cheadaítear dó nó di a fháil?

Táimid ag tairiscint dáileog amháin den vacsaín Comirnaty® (Pfizer BioNTech) nó den vacsaín Spikevax® (Moderna) do dhaoine óga. Is vacsaíní mRNA iad sin. Is féidir le leanaí agus daoine óga idir 12–15 bliana d’aois na vacsaíní seo a fháil fiú má fuair siad vacsaín eile roimhe seo. Tabharfaimid bileog eolais duit faoin vacsaín a bheidh á fáil aige nó aici. Tá eolas tábhachtach inti; léigh go cúramach í. Tá sí le fáil ag [hse.ie/covid19vaccine/](https://hse.ie/covid19vaccine/) chomh maith.

## **Cathain ba cheart dó nó di dáileog bhreise den vacsaín in aghaidh COVID-19 a fháil?**

Ba cheart dó nó di dáileog bhreise den vacsaín a fháil dhá mhí ar a laghad tar éis dó nó di cúrsa vacsaíne in aghaidh COVID-19 a chríochnú.

Má bhí COVID-19 air nó uirthi ó vacsaíníodh é nó í, ní mór dó nó di fanacht go ceann sé mhí roimh dó nó di dáileog bhreise a fháil.

## **Céard is eol faoi cé chomh sábháilte agus atá sé dáileog bhreise den vacsaín a fháil?**

Níl an méid céanna faisnéise againn maidir le sábháilteacht dáileoige breise den vacsaín in aghaidh COVID-19. Tá dáileog bhreise á tabhairt i roinnt tíortha. De réir na staidéar atá déanta ar dhaoine a fuair dáileog bhreise, níl aon fho-iarmhairtí tromchúiseacha i gceist léi.

## **An bhfuil dáileog bhreise den vacsaín ceadúnaithe ag an nGníomhaireacht Leigheasra Eorpach?**

Tá dáileog bhreise den vacsaín mRNA chéanna ceadaithe ag an nGníomhaireacht.

Tá an Coiste Comhairleach Náisiúnta um Imdhíonadh ag moladh gur féidir leat aon cheann de na vacsaíní mRNA a fháil, is cuma cén vacsaín a fuair tú ar an gcéad dul síos. Má fuair tú an vacsaín AstraZeneca, cuir i gcás, seans go dtairgfear dáileog bhreise de Moderna nó Pfizer duit anois. Is é sin atá á mholadh ag an gCoiste Comhairleach Náisiúnta um Imdhíonadh, ach níl sé ceadaithe fós ag an nGníomhaireacht Leigheasra Eorpach.

Téigh chuig [ema.europa.eu](https://ema.europa.eu) le tuilleadh eolais a fháil.

## **An féidir le daoine óga an dáileog bhreise den vacsaín in aghaidh COVID-19 a fháil ag an am céanna leis an vacsaín in aghaidh fliú nó le vacsaíní eile?**

Is féidir leo an dáileog bhreise den vacsaín in aghaidh COVID-19 a fháil ag an am céanna leis an vacsaín in aghaidh fliú nó le vacsaíní eile, amhail HPV, Tdap nó MenACWY, a chuirtear ar fáil do dhaltai i gcéad bhliain na meánscoile.

## **Tuilleadh eolais**

Tá tuilleadh le léamh faoi na vacsaíní ar [hse.ie/covid19vaccine/](https://hse.ie/covid19vaccine/)

Is féidir leat labhairt le do dhochtúir teaghlaigh, altra, cógaiseoir nó vacsaíneoir chomh maith.